

**Uunga siunnersuut: Mittarfeqarfiit A/S pillugu Inatsisartut inatsisaat**  
(Ineqarnermut Attaveqaasersuutinullu Naalakkersuisoq)

**Saqqummiussissut**

(Ineqarnermut Attaveqaasersuutinullu Naalakkersuisoq)

**Siullermeerneqarnera**

Mittarfinni attaveqaasersuutit suliffeqarfimmit nammineertitamit Mittarfeqarfinit, mittarfitsinnik 13-iusunik, qulimiguulinnullu mittarfitsinnik 46-sunik ingerlatsisumit ullumikkut isumagineqarput. Mittarfissat pillugit Inatsisartut 2018-imi aalajangiinerisa kingunerisaannik, suliffeqarfiit mittarfinnik piginnittuunngikkunik, sanaartortuunngikkunik, ingerlatsisuunngikkunilluunniit maanna pingasuupput: Kalaallit Airports International A/S, Kalaallit Airports Domestic A/S kiisalu Mittarfeqarfiit. Mittarfinnik ingerlatsinermi piginnaasanik assigiinnik tamarmik pisariaqartitsipput. Tamanna ilisimasat paasisimasallu pigilernissaannut, piginnarnissaannullu unammillernartitsilereerpoq.

Nunami mittarfinnik ingerlatsinerup aaqqissuussaannermi ataatsimi ataatsimoortinneqarnissaa, inatsisissatut siunnersuutitigut siunertaavoq. Tulliuttut pingasut tassuunatigut qulakkeerneqassapput: siullertut sulisutigut piginnaasat naammattut piukkunnaatillillu qulakkeerneqarnissaat, aappaattut ingerlatsinermi pitsaanerusumik aningaasaqarneq, angisuunillu ingerlataqarnermi iluaqutit qulakkeerneqarnissaat kiisalu pingajuattut sunniivigeqatigiinnissap qulakkeerneqarnissaa. Taamaattumik Mittarfeqarfiit Kalaallit Airports Holding A/S-ip ataani immikkoortortanngortinneqarnissaa siunnersuutitigut anguniarneqarpoq.

Mittarfiit politikikkut suli nakkutigineqarnissaat qulakkeerniarlugu, kiffartuussinissamik isumaqatigiissutitigut akiliuteqartarnikkut mittarfinnik amigartoorutaasartunik ingerlatsinissamik, Naalakkersuisut ingerlatseqatigiiffimmut pisussaaffiliisinaanissaat anguniarneqarpoq. Mittarfiit inuiaqatigiinni attaveqaasersuutitigut pingaarutilittut inissisimmamata, taamaattumillu politikikkut nakkutigineqarnissaat suli pisariaqartutut Naalakkersuisuni isigigatsigu tamanna anguniarparput.

Mittarfeqarfiit tunngaviummik piginnaasaqarfimminik, imaappoq mittarfinnik ingerlatsinermik ukkatarinninnissaa, inatsisissatut siunnersuutitigut Naalakkersuisut ilutigalugu anguniarpaat. Taamaattumik pigisat nalillit ingerlatseqatigiiffittaamut akileeqataassutigineqartussaannngitsut, assersuutigalugu pilersuiviit, aamma pilersaarusifigineqarput.

Inatsisissatut siunnersuut aningaasatigut annertuumik imminermini kinguneqassanngilaq. Taamaakkaluortoq Nuummi Ilulissanilu mittarfiit 2024-mi atulernerisigut, Mittarfeqarfiit isertittagai annertuumik appariassapput. Mittarfeqarfiit suliffeqarfittut nammineertitatut

ingerlaannaraluarpalluunniit, aktianik piginneqatigiiffittulluunniit ingerlanneqaraluarpat isertittagai annertuumik appariartussaapput. Mittarfinnik aqqissuusseqqinnerup kingunerisaanik pitsanngorsaatinik, isertitat appariaataat annertuutigit matussuserneqassapput.

Tamatuma saniatigit mittarfippaaluit ukiuni tulliuttuni nutarterneqassapput, tamannalu aamma akikitsuinnaassanani. Suliap ingerlanerani tunngaveqarlutik Inatsisartut siunissami tamanna pillugu aalajangiisinnaaqqullugit, mittarfinnik aqqissuusseqqinnermi naatsorsuutigisamik aningaasaqarnissaq Naalakkersuisut ukioq manna qulaajassavaat.

2018-imi aalajangiineq tunuliaqutaralugu, mittarfinnik aqqissuusseqqinnermi aningaasatigit kingunissai aalajangersimammata erseqqissaatigissavara. Nunami mittarfinnik tamanik siunissami ingerlatsinissami pitsaanerpaanik atugassaqartitsinissaq, aningaasatigullu pitsaanerpaamik sinaakkuteqartitsinissaq qulakkeerniarlugu, tamatuma kingunerisaanik Mittarfeqarfiit aktianik piginneqatigiiffinngortinneqarnissaa aalajangiisuusumik pingaaruteqarpoq.

Taamatut oqaaseqarlunga siunnersuut Inatsisartuni kajumittumik suliassanngorlugu tunniuppara.